

Kityi nu ngwa'an Palyu ndyaa se'en ndi'in nten 'in Jesucristo nde kichen Filipos

¹ Palyu lo'o Timu lka ba re. Ta'a tyukwaa ba ngi'ni ba tñan 'in Jesucristo, kan' cha' nda'an ba kityi re cha' tsaa se'en ndi'in wan, cha' ta'a nten 'in Ndiose lkaan. Wa msñian cha' 'in Jesucristo, kan' cha' lkaan nten 'in Ndiose. Kwi' ngwañ'an, lo'o kityi re chkwi' ba chin' lo'o nchga yu kula nu nka ndloo 'in nchga ta nten 'wan, lo'o chkwi' ba chin' lo'o xka ta la ne' nu lka tñan cha' 'wan, nu ndaya' 'a 'wan.

² Nde lka cha' nu nchka tiän', cha' ña'an ti ku'ni la Ndiose Stian cha' su'we lo'o wan, cha' tiin ti tyi'in wan chun' nu ndyaa ña'an ti' wan 'in Jesucristo nu nka X'naan.

Nchkwi' Palyu lo'o Ndiose cha' 'in ne' Filipos kan'

³ Nchga bra nu ndyu'wi tiän' 'wan, bra kan' su'we 'a nka tiyeën; ndyaän xu'we 'in Ndiose cha' 'in nchga wan bra kan'.

⁴ Ndiya 'a tiän' njñaän ska cha' 'in Ndiose cha' 'wan bra nu nchkwiin' lo'o Ni.

⁵ Ti bra nu ynan wan cha' su'we 'in Krixtu ti kulo, ña'an ti ja ya tyii cha' ndaya' wan 'ñaän cha' chkwiin' cha' kan' lo'o xka ta nten nu ndi'in tijyu' la;

⁶ kan' cha' jlyo tiän' ni, cha' ña'an ti ku'ni Ndiose tñan ni' kasiya 'wan, sa ña'an ya' nu tsaa to'o su'we tñan kan', bra nu kan Jesucristo xiya', cha' kwi'

Ndiose lka nu mdyisnan ngi'ni tñan ni' kasiya 'wan ti kulo.

⁷ Su'we cha' ngwaña'an nda'an cha' tiyeën cha' 'wan, cha' nchga tsan su'we 'a nka tiyeën na'aän 'wan; su'wa ti nka tiye wan lo'oŭn, su'we 'a ngi'ni wan lo'oŭn cha' ngi'nian tñan 'in Jesucristo. Lye 'a ndaya' wan 'ñaän nu ngwa xkan' bra nu mdi'iin tloo ne' nu nka ndloo, cha' mdo'oŭn luwiin tloo ne' kan'. Bra kan' ykwiin' lo'o ne' cha' su'we 'a lka cha' nu wa ytsa' Ndiose 'ñaän, lo'o ngwaña'an ytsaän' ñi 'in ne' sa ña'an lka cha' nu ñi kan'. Lo'o ni, ti ndaya' 'a wan 'ñaän, ni siya nsu'wiin ni' ña'an chkwan chun' cha' nchkwiin' cha' 'in Jesús lo'o nten.

⁸ Jlyo ti' Ndiose cha' sa ña'an nu su'we nka tiye Jesucristo ña'an Ni 'in ta'a wan, kwi' ngwaña'an su'we 'a nka tiyeën na'aän 'wan.

⁹ Nde lka cha' nu nchkwiin' lo'o Ndiose cha' 'wan: njñaän chabiya' 'in Ni cha' ña'an ti su'we la xu'wi tiye wan ña'an wan 'in ta'a nten wan, cha' ngwaña'an ka biya' la ti' wan nchga cha', cha' ngwaña'an su'we la tya'an cha' tiye wan;

¹⁰ njñaän 'in Ni cha' nchga bra ka ki'ya cha' ke wan sa ña'an cha' nu su'we la ku'ni wan, cha' ja xlyaa 'a wan ku'ni wan cha' kuxi, lo'o ja kanun yuwe' 'wan bra nu tiya tsan cha' kan Krixtu xiya'.

¹¹ Ka'an 'a cha' su'we ka ku'ni wan nchga se'en ndi'in wan lo chalyuu chun' Jesucristo, cha' ngi'ni Krixtu tñan ni' kasiya 'wan; kan' cha' ka ku'ni tnun wan 'in Ndiose, bra nu tyu'wi ti' wan cha' tnun nu ngi'ni Ni.

Ska ti cha' nchka ti' Palyu lo chalyuu, cha' ka yu tñan 'in Krixtu

12 'Wan ta'a msñian cha' 'in Krixtu, nchka tiän' cha' ka biya' su'we ti' wan cha' wa ynen la cha' su'we 'in Jesús lo kichen re, chun' nu ti'í nu ndijiin re.

13 Nsu'wiin ni' ña'an chkwan ni, kan' cha' jlyo ti' nchga nten nu ndi'in na'an tnun 'in gobierno re, cha' wa msu'wa ne' 'ñaän ni' ña'an chkwan chun' cha' nda'aän lo tñan 'in Krixtu; ni siya nchga sndaru nu ndi'in nde re, ni siya xka ta nten, jlyo ti' ne' cha' kan'.

14 Lo'o ngwaña'an nchga ta'a msñian cha' 'in Jesús, su'we la ndyaa ña'an ti' ne' cha' 'in X'naan ni, ngwa ngula la chin' tiye ne' ni; ja ntsen ne' chkwi' ne' cha' 'in Ndiose lo'o xka la nten, cha' lo'o na' ja ntseän laja nu nsu'wiin ni' ña'an chkwan re.

15 Chañi cha' ndiya nten nu nchkwi' cha' 'in Krixtu lo'o ta'a nten ne', ni siya chen nka tiye ne'; nchka 'a ti' nten kan' xuun ta'a ne' lo'o ba. Lo'o ti ndiya la chin' xka ta nten nu nchkwi' cha' kan' cha' su'we nka tiye ne' lo'o ba.

16-17 Su'we 'a nka tiye ne' kan' ña'an ne' 'in Ndiose, lo'o ngwaña'an jlyo ti' ne' cha' wa nda Ni tñan 'ñaän cha' xkweän 'in nten nu nxuun lo'oan cha' su'we nu 'in Krixtu. Nten nu chen nka tiye ni, si'i tyukwi ti tiye ne' nchkwi' ne' cha' 'in Krixtu; nchka ti' ne' tyijin lyo ne' 'in ta'a nten ne'. Lo'o ngwaña'an, nchka 'a ti' ne' kan' ta la ne' nu ti'í 'ñaän laja nu nsu'wiin ni' ña'an chkwan re.

18 Ja nduwe tiän' sa ña'an ngi'ni ne' kan', ni siya tyukwi ti tiye ne' chkwi' ne' cha' 'in Krixtu lo'o nten, ni siya cha' kwiñi nka tiye ne' bra nu nchkwi' ne' cha' kan'; su'we 'a nka tiyeän cha' 'in ya ña'an ti nten nu chkwi' cha' 'in Krixtu kan'.

Ngwaña'an su'we la ka tiyeän tyempu nde loo la.

19 Nxke' tiǎn' cha' ndla ti ka su'we la cha' 'ñǎǎn re, cha' jlyo tiǎn' sa ña'an njñan 'a wan cha' 'in Ndiose cha' tyo'oũn ni' ña'an chkwan re, cha' wa lyaǎn; jlyo tiǎn' cha' ti kwi' Tyi' i ykwi' Jesucristo lye 'a nsu'wa ya' 'ñǎǎn.

20 Nde lka tñan nu nchka tiǎn' ku'niin: Nchka 'a tiǎn' cha' ja ka jyu'u tiǎn' chkwiin' cha' 'in Jesús lo'o nten; ni siya tyempu nu ndijyan nde loo la, ni siya bra ni, ja ka jyu'u tiǎn' bra kan', nka tiyeen. Nchka tiǎn' cha' ka ngula la tiyeen cha' chkwiin' cha' 'in Jesús lo'o nten. Ngwaña'an nchka tiǎn' ku'niin, cha' ña'an ti ku'niin tnuun 'in Krixtu, ni siya ti lu'uun, ni siya wa ngujwiin.

21 Ska ti cha' nchka tiǎn' ku'niin lo chalyuu, cha' kaǎn tñan 'in Krixtu. Su'we la ni siya kajaǎn, nxke' tiǎn', cha' bra kan' ka ña'aǎn 'in Ndiose;

22 ja jlyo tiǎn' nan lka nu su'we la ku'niin, cha' ja chan ka ku'niin ti ka'an la tñan 'in nu nka X'naan, si ti ndi'iin laǎn lo chalyuu.

23 Tyukwaa lo cha' nchka tiǎn' cha' ka 'ñǎǎn sikwa: Nchka 'a tiǎn' kulaa ti'iin chalyuu re, cha' bra kan' ka tyi'iin lo'o Krixtu, cha' kan' nu su'we la, nxke' tiǎn';

24 lo'o ni, ndloo la cha' 'wan cha' tyi'iin laǎn lo chalyuu re.

25 Nxke' tiǎn' cha' ngwaña'an ka 'ñǎǎn, cha' ti tyi'iin laǎn ti chin' lo chalyuu re. Bra kan' ka tayaǎn' laǎn 'wan ta'a wan, cha' sten su'we la wan cha' 'in Krixtu; ngwaña'an ka su'we la ka tiye wan cha' nu su'we la tsaa ña'an ti' wan 'in Ni.

26 Bra nu kaǎn tyi'iin se'en ndi'in wan xiya', bra kan' su'we la ka tiye wan cha' 'in Jesucristo chun' tñan nu wa y'niin.

²⁷ Kan' cha' ni, ki'ya wan kwenta sa ña'an ndi'in cha' ku'ni wan lo chalyuu xa wa msñi wan cha' 'in Krixtu. Si ngwaña'an ku'ni wan, bra kan' ja n'ni cha' ni siya kaän kichen tyi wan, ni siya ja ka kaän. Ja chan kaja cha' 'ñaän cha' ska ti cha' nsu'wi tiye wan lo'o ta'a wan, cha' nsu'wi 'a cha' tlyu ti' 'wan lo'o nten nu nxuun lo'o wan; ja chan su'wa ti nda'an cha' tiye wan lo'o ta'a wan, ni siya chan 'a nchkwí' wan lo'o ne' cha' xñi ne' cha' su'we kan' 'in Krixtu.

²⁸ Bra nu ku'ni wan ngwaña'an, bra kan' ja ndi'in cha' kutsen wan 'in nu nxuun lo'o wan, chun' cha' ka biya' ti' ne' cha' ndi'in cha' ku'ni tyii Ndiose nchga nten kuxi. Lo'o 'wan ni, wa ngulaa wan 'in nu kuxi kan'; wa y'ni Ndiose cha' ka tyijin lyo wan 'in nchga cha' kuxi kan'.

²⁹ Su'we 'a lka cha' mda Ndiose chabiya' cha' msñi wan cha' 'in Krixtu, ni siya ndi'in cha' tyijin wan chin' nu ti'í, cha' nu msñi wan cha' 'in Krixtu kan'.

³⁰ Su'wa ti nchka cha' 'wan lo'oŋn, ti'in 'a tñan nu wa mjwi 'ñaan. Wa na'an wan sa ña'an y'niñ tñan ti ngwa xkan', cha' lye 'a msuñ lo'o nu kuxi; kwi' ngwaña'an, ka biya' ti' wan cha' lye 'a ngi'niñ tñan ni.

2

Ngwa Jesús ska yu ti'i bra nu yan yu lo chalyuu, lo'o chun' ndi'in la tlyu 'a chabiya' mda Ndiose 'in yu

¹ Ja chan wa ngula la tiye wan ni, cha' wa msñi wan cha' 'in Krixtu; wa su'we la nka tiye wan ni, cha' su'we 'a nka tiye Ni ña'an Ni 'wan. Ti kwi' ti cha', lo'o Tyi'i Ndiose su'wa ti ndi'in cha' 'wan lo'o

ta'a wan, ngwaña'an lo'o Ndiose. Lo'o ni, ngwa t'nan la ti' wan 'in ta'a nten wan, wa ngwa su'we tiye wan ña'an wan 'in ta'a nten wan.

² Kan' cha' ni, si chañi cha' ngwaña'an ngi'ni wan, ku'ni wan cha' ka su'we ka tiyeēn sikwa; ngwaña'an ka bra nu ña'aän cha' su'wa 'a ndi'in cha' 'wan lo'o ta'a wan, cha' ska ti cha' nka tiye wan, cha' ska ti cha' nda'an tiye wan, cha' ska ti biya' su'we ti ngi'ni wan lo'o ta'a wan.

³ Ja chkwi' wan lye 'a bra nu ku'ni wan ska tñan; si'i xkwi' cha' 'wan, ti ykwi' ti wan, tya'an cha' tiye wan. Kwi' ngwaña'an, ja ku'ni siye' wan lo'o ta'a wan. Su'we la si tya'an cha' re tiye wan, cha' su'we la xka yu ta'a wan, ja su'we ykwi' wan.

⁴ Kuwe la ti' wan 'in xka yu ta'a wan cha' ka su'we la cha' 'in ne', si'i xkwi' cha' 'wan, ti ykwi' ti wan, nu ndi'in cha' kuwe ti' wan.

⁵ Su'we la si tya'an cha' tiye wan cha' re, ti kwi' ña'an cha' nu mda'an tiye ykwi' Jesucristo. Ngwaña'an ngwa 'in yu:

⁶ Tyukwi tyempu lka Jesucristo Ndiose siya' ti, ja nsu'wi bra nu ja lka yu Ndiose; bra nu yan yu lo chalyuu, ja mda'an cha' tiye Jesús cha' kan lo'o yu nchga chabiya' 'in Ndiose, ni siya yu'wi 'a chabiya' 'in yu se'en mdi'in yu nu ngwa ti kulo, cha' su'wa ndi'in cha' 'in yu lo'o Ndiose Sti yu.

⁷ Mxnun yu chabiya' nu nsu'wi 'in yu se'en ndi'in Ndiose Sti yu, cha' su'we la ngwa tiye yu xa nu y'ni yu ngwaña'an. Bra kan' mslyaa yu ngwa yu nten, cha' kaja ña'an taya' yu 'ñaan; sa ña'an ndlya nten, ngwaña'an ngula yu lo chalyuu, nten siya' ti ngwa yu.

⁸ Ngwa yu ska nten ti'i, lo'o ngwaña'an su'we 'a

mdukwa yu tñan nu ngulo Ndiose Sti yu 'in yu, ni siya ngujwi yu. Lo'o ngujwi yu lo wsi, ña'an ti' ndujwi nten 'in ne' nu xa'an 'a bra kan'.

⁹ Kan' cha' ni, wa ndyaa lo'o Ndiose 'in yu cha' su'wa ti tyi'in yu nde se'en tlyu la se'en ndukwa Ni; lo'o tlyu 'a chabiya' wa nda Ni 'in Jesús ni. Tyukwi ña'aan chalyuu ja nsu'wi la xka chabiya' nu tlyu la,

¹⁰ cha' ngwaña'an tyuun xtyin' nchga nan lu'u tloo Jesús, ni siya nten, ni siya kwi'in. Ja tyii cha' ku'ni tnun nten 'in Ni, cha' 'in chabiya' nu tnun 'a nu wa nda Ni 'in yu, ni siya nu ndi'in ni' kwan, ni siya nu ndi'in lo chalyuu, ni siya nten nu wa ngutsi', lo'o ayman kan' ku'ni tnun ne' 'in yu.

¹¹ Kwen 'a chkwi' nchga nten cha' Jesucristo lka X'nan nchga chalyuu, ngwaña'an su'we 'a ku'ni tnun ne' 'in Ndiose Stian.

Sa ña'an xaa nu nda kwii kulasiin xa tla, ngwaña'an nkaan laja nu ndi'ian lo chalyuu

¹² 'Wan ne' ta'aan nu ndiya 'a tiän' 'wan, mdukwa 'a wan cha' nu ykwiin' nchga tsan bra nu mdi'iin lo'o wan; lo'o ña'an ti ndloo 'a cha' 'wan cha' ti tukwa la wan cha' nu nchkwiiin' ni, ni siya tijyu' 'a ndi'iin se'en ndi'in wan. Ña'an ti ku'ni wan tñan cha' ku'ni ji nchga cha' nu ngwa ti' Ndiose ku'ni ni' kasiya 'wan bra nu ngulaa Jesucristo 'wan 'in cha' kuxi. Chin' ti cha' xu'wi tiye wan, ti ykwi' ti wan, kuwe la ti' wan 'in Ndiose.

¹³ Tyu'wi ti' wan cha' nchga tsan ngi'ni Ndiose tñan ni' kasiya 'wan, cha' ka ku'ni wan tñan 'in Ni; ngwaña'an ngi'ni Ni cha' xlyaa wan ku'ni wan nchga tñan nu nchka ti' Ndiose cha' ku'ni wan.

14 Nchga lo tñan nu ku'ni wan ni, si'i xkwi' nan ngi'ni ki'ya wan ska cha' xa nu ngi'ni wan tñan kan'. Ja chkwi' wan cha' chen ña'an lo'o nten,

15 cha' ja ka chkwi' ne' cha' ndukwi wan ki'ya, si'ya cha' kuxi nu ngi'ni wan bra kan'. Su'we la si ka biya' ti' ne' cha' chañi cha' lka wan sñi' Ndiose tyukwi ti tiye wan, ni siya xkwi' laja nten kuxi ndi'in wan lo chalyuu, laja nten nu chen nka tiye ne' ña'an ne' 'in ta'a nten ne'. Cha' 'wan ndi'in cha' kanen cha' 'in Jesús nchga se'en ndi'in nten kan'; sa ña'an xaa nu nda kulasiin tla, ngwaña'an ta wan xaa lo chalyuu,

16 bra nu chkwi' wan lo'o ne' cha' su'we nu 'in Krixtu nu ka ta chalyuu nu ja tsaa tii 'a 'in ne'. Si ngwaña'an ku'ni wan, ka su'we 'a ka tiyeen na'aan 'wan bra nu tiya tsan nu ku'ni biya' Krixtu 'in nchga nten. Bra kan' ka biya' tiän' cha' su'we ti yaa to'o tñan 'ñaän, si'i nan mna' tñan 'ñaän ya ña'an ti.

17-18 Jlyo tiän' cha' si'i chin' ti tñan y'ni wan bra nu msñi wan cha' 'in Ndiose; ka'an 'a nan nu mxnun wan, tyun ya' nda wan tyukwi ña'aan wan cha' ka wan tñan 'in Krixtu, chun' nu wa msñi wan cha' 'in Ni. Lo'oün kujwi ne' 'ñaän ni, nxke' tiän'; kana' chalyuu 'ñaän ni cha' 'wan. Lo'o ja ntseän; ni siya ngwaña'an ka 'ñaän, su'we 'a ka tiyeen se'en ndi'iin. Kwi' ngwaña'an nxke' tiän' cha' ka su'we tiye wan, cha' su'wa ti ka su'we tiyeen lo'o wan.

Nchkwi' Palyu cha' 'in Timu lo'o Epafrodito

19 Chabiya' 'in Jesús nu nka X'naan, ja chan ndla ti su'waän 'in Timu cha' tsaa yu se'en ndi'in wan, cha' kaja chin' rsun 'ñaän sa ña'an ndi'in wan; su'we 'a ka tiyeen bra nu kunaän cha' kan'.

20 Ska ti yu kan' lka nu chañi cha' su'wa ti nka tiye yu lo'oũn, nu chañi cha' su'we nka tiye yu ña'an yu 'wan;

21 ja nsu'wi 'a xka ne' ta'aan nde re nu nduwe ti' sa ña'an nchka tñan 'in Jesucristo se'en ndi'in wan; xkwi' tñan 'in ne' nsu'wi la tiye ne'.

22 Lo'o 'wan, wa jlyo ti' wan cha' luwi 'a tñan nu ngi'ni Timu kan'. Su'wa ti ngi'ni yu tñan lo'oũn sa ña'an si wa lka yu sñiën', su'wa ti nda'an ba nchkwi' ba cha' su'we 'in Jesús lo'o ne' xka kichen.

23 Bra nu tyii ka biya' 'ñaän lo'o wse, bra kan' su'waän 'in yu cha' bra ti tsaa yu se'en ndi'in wan,

24 ni siya nxke' tiän' cha' lo'oũn ykwiin' kaän ndla ti se'en ndi'in wan, chabiya' 'in ykwi' X'naan.

25 Lo'o ngwaña'an, ndi'in 'a cha' kan xka yu se'en ndi'in wan, nka tiyeën; Epafrodito naan yu kan'. Ti kwi' yu ta'a nda'an ba tñan lka yu, lo'o ngwaña'an, ngula 'a tñan y'ni yu lo'o ba bra nu mxkwen ba 'in ne' kuxi cha' 'in Jesús. Ti kwi' yu kan' lka yu nu msu'wa wan 'in yu yan se'en mdi'iin nu ngwa xkan', cha' taya' yu 'ñaän lo'o nan lka nu lyiji chin' 'ñaän cha' tyijin yu'wi 'ñaän lo' chalyuu.

26 Ndiya 'a ti' yu 'wan, kan' cha' nchka ti' yu kan na'an yu 'wan xiya'; ka'an 'a cha' mda'an tiye yu bra nu mjwi rsun 'in yu cha' wa ynan wan cha' ti'í 'a yu.

27 Lo'o chañi cha' ti'í 'a yu nu ngwa bra kan', ngwa cha' kaja yu; lo'o Ndiose ngwa t'nani Ni 'in yu. Kwi' ngwaña'an, ngwa t'nani Ni 'ñaän, cha' ngwa xi'in 'a tiän' nde re; lo'o kan' lye la ngwa xi'in tiän' si wa ngujwi yu, lo'o wa nchkaa yu ni.

28 Kan' cha' su'we 'a nka tiyeën ni, si ndla ti kan

yu se'en ndi'in wan, cha' lo'o wan ka su'we la ka tiye wan, bra nu ña'an wan 'in yu xiya'. Ja ndi'in cha' kuwe 'a tiän' cha' 'wan bra kan'.

²⁹ Ka su'we 'a ka tiye wan lo'o yu ni; su'we 'a chkwi' wan lo'o yu bra nu tiyan yu se'en ndi'in wan, cha' lka yu ta'a msñi wan cha' 'in X'naan. Kwi' ngwaña'an, ku'ni tlyu wan 'in ya ña'an ti nten nu ku'ni sa ña'an nu ngi'ni yu kan';

³⁰ ja ytsen yu, ni siya wa kaja ti yu laja nu mdaya' yu 'wa lo'o tñan 'in Krixtu re ti ngwa xkan'. Ni siya ja ngwa kan wan nde re, wa msu'wa wan 'in ykwi' yu yan yu cha' ku'ni yu ti kwi' tñan nu ja ngwa 'wan ku'ni wan, cha' nu ndaya' 'a yu 'wa bra kan'.

3

Sa ña'an nu chañi ka cha' katin ki'ya nu nsu'wi ñaan cha' 'in Ndiose

¹ 'Wan ta'a msñian cha' 'in Jesús, nchka 'a tiän' cha' ka su'we 'a ka tiye wan ni chabiya' 'in ykwi' nu nka X'naan. Ja n'ni cha' ñaän, ni siya xiya' chkwiin' ti kwi' ta'a cha' nu ytsaän' 'wan ti kulo; ja chan tayaän' chin' 'wan, si chkwiin' ngwaña'an xiya'.

² Kan' cha' ni, ndii ti ti' wan, ki'ya su'we wan kwenta 'in ne' kuxi kan', cha' nu sa ña'an nu ngi'ni xne' ndaja, ngwaña'an ngi'ni ne' kan'. Lo'o cha' kula nu ndyaa ña'an 'a ti' ne' kan', kan' cha' ndatsaa ne' 'in xka ta nten cha' xi'yu kijin 'in ne', ni siya kuxi nsu'wi tiye ne' ngi'ni ne' tñan kan', si'i nan su'we nka tiye ne'.

³ Nan ni, chañi lka cha' nkwan Ndiose ñaan, ni siya xka ña'an nchkwi' ne' kan'. Ngi'ni tnuan 'in Ndiose chabiya' 'in Tyi'i Ni; su'we 'a nka tiye an

ndi'ian lo chalyuu ni, xa wa mjwi chalyuu kwi 'ñaan nu nda Jesucristo, lo'o ja ndyaa ña'an tian' xka la cha' nu ndatsaa 'a 'in nten chalyuu ta'aan.

⁴ Lo'oũn, yaa ña'an 'a tiãñ' 'in cha' kula kan'. Ti ngwa xkan' la ni, ja yu'wi xka nten nu su'wa y'ni lo'oũn, lye la mdukwaãn nchga cha' kula nu nsu'wi 'in ne' judío ta'a ba.

⁵ Wa snu' ti tsan nsu'wiĩn bra nu msi'yu ne' kijiĩn cha' nkwan ne' 'ñaãn; ne' judío lkaãn ti xa nu ngu-laãn, tnen ne' hebreo kan' lka tneẽn. Ngwaña'an ti kwi' ne' Benjamín ngwa ne' kula 'ñaãn. Ne' fariseo lkaãn, kan' cha' mdukwaãn 'aãn nchga tñan nu ndi'in cha' ku'ni ba cha' 'in cha' kula 'in ne' judío;

⁶ chun' cha' nu yaa ña'an 'a tiãñ' 'in cha' kula kan', kan' cha' lye 'a mdaãn nu ti'í 'in ya ña'an ti nten nu msñi cha' 'in Jesucristo, y'niĩn liye' 'a tiãñ' 'in ne' kan'. Lo'o ngwaña'an, ja ndi'in 'a ki'ya 'ñaãn lo'o ne' judío cha' 'in cha' kula kan', cha' mdukwaãn 'aãn nchga cha' kula kan'; ti s'ni wa ngwa luwi kasiya 'ñaãn, si chañi cha' ka su'we kasiya 'ñaan cha' 'in Ndiose ngwaña'an ti.

⁷ Ti s'ni mske' tiãñ' cha' su'we 'a nten lkaãn chun' nu mdukwaãn cha' kula kan'; lo'o ni, ja ndloo 'a cha' kan' 'ñaãn chun' ndyaa ña'an tiãñ' 'in Krixtu.

⁸ Lo'o ngwaña'an, ni siya kana' nchga cha' nu ndiya 'a tiãñ' lo chalyuu, ja nduwe tiãñ'; tlyu la lka cha' su'we nu wa mjwi 'ñaãn ni, cha' nsu'wi lyoũn 'in Jesucristo nu nka X'naãn. Wa y'ni Krixtu cha' wa ngulaa yaãn' nchga cha' kula kan'; lo'o ja su'we cha' kula kan' siya' ti, nxke' tiãñ' ni. Sa kan' ti cha' nchka tiãñ', cha' sñiĩn su'weẽn cha' 'in Krixtu,

⁹ cha' su'wa ka tiyeẽn lo'o Ni. Nu ngwa s'ni, ja y'ni tyii 'a Ndiose ki'ya 'ñaãn ni siya mdukwaãn

'aǎn cha' kula kan'; siya' ti bra nu ndyaa ña'an tiǎn' tñan nu y'ni Krixtu, bra kan' y'ni tyii ji Ni ki'ya 'ñaǎn. Sa kan' ti tñan y'ni Ni cha' ka su'we kasiya 'ñaǎn.

¹⁰ Lo'o ni, sa kan' ti cha' nchka tiǎn', cha' xu'wi lyoũn jiiñ 'in Krixtu, cha' ka jlyo tiǎn' cha' ti ngi'ni Ndiose tñan lo'oũn lo'o ti kwi' jwersa nu wa yu'wi 'in Ni bra nu y'ni Ni cha' ndyu'u Jesús xiya'. Ja n'ni cha' ni siya ngwaña'an tyijiĩn nu ti'í sa ña'an nu wa mdijin Jesús nu ti'í, ni siya kana' chalyuu 'ñaǎn kajaǎn sa ña'an nu ngujwi Krixtu lo wsi.

¹¹ Lo'o ni, ndi'in taǎn cha' kaja xka chalyuu 'ñaǎn chun' ndi'in la, ska chalyuu nu ja tsaá tii 'a 'ñaǎn ni siya wa ngujwiĩn.

Ku'nian tñan cha' kaja ska cha' tnun 'ñaan nde loo la

¹² Ja chkwiĩn' cha' wa mdyii ngwa su'we kasiya 'ñaǎn tloo Ndiose siya' ti, lo'o ni, ja ndi'in 'a ki'ya 'ñaǎn; ja chkwiĩn' ngwaña'an. Nan wa ykwi' Jesucristo lo'oan cha' lkaan nten 'in Ndiose, kan' cha' lye 'a ngi'niĩn tñan cha' ka su'we ji kasiya 'ñaǎn.

¹³ 'Wan ta'a msñian cha' 'in Krixtu, jlyo tiǎn' cha' ti ji ka 'ñaǎn ngwaña'an. Sa kan' ti cha' ndloo 'a 'ñaǎn, cha' ndla ti ku'niĩn cha' kaja cha' tnun 'ñaǎn nde loo la, cha' ka su'we ji kasiya 'ñaǎn lo'o Ndiose, ni siya ja tyaa yu'wi 'a tiǎn' nchga cha' nu ngwa 'ñaǎn nu ngwa ti s'ni.

¹⁴ Kan' cha' sikwa, ndi'in cha' xñian tuwiin nu ñi cha' kaja cha' tnun kan' 'ñaan, ti kwi' cha' kan' nu wa y'ni xu'we Ndiose cha' 'ñaan se'en ndi'in Ni. Ka kaja cha' kan' 'ñaan la bra kan', chun' cha' nu wa ngwa su'wa cha' 'ñaan lo'o Jesucristo.

15 Su'we 'a si kwi' ngwaña'an tya'an cha' tiye'an, ta'aan nu wa msñiin su'wean cha' 'in Jesús; Ndiose lka nu kwa'u ñi la 'wan bra kan', si nsu'wi xka la ne' ta'a wan nu nda'an tiye xka la cha'.

16 Su'we sikwa, ti ku'niin laan ti kwi' ta'a cha', sa ña'an nu ngwa biya' su'we tian' ti kulo.

17 'Wan ta'a msñian cha' 'in Jesús, su'we si ku'ni wan sa ña'an cha' nu wa na'an wan 'ñaän ngi'niin. Kwi' ngwaña'an, ki'ya su'we wan kwenta sa ña'an nu ngi'ni xka la ne' ta'aan, nu ngi'ni sa ña'an nu ngi'ni ti bare, kwi' ngwaña'an ku'ni wan.

18 Wa tyun 'a ya' wa ytsa' ba cha' re 'wan, lo'o ni, chkwiin' lo'o wan xiya', ni siya xi'in 'a tiän' chkwiin' cha' re: Nsu'wi 'a nten nu nxuun lo'o Krixtu, ni siya wa ngujwi yu lo wsi cha' katin ki'ya 'in ne'; ta'a wsuun Krixtu lka ne' kan', cha' nsu'wi 'a cha' kuxi nu ngi'ni ne' nchga se'en nda'an ne'.

19 Ndi'in cha' tyaa ne' kan' la chalyuu tla bra nu kaja ne', cha' nsu'wi ska ndiose kwiñi 'in ne' kan'; nchga nan nu nxitukwi 'a ti' ne' cha' kaja 'in ne' lo chalyuu, kan' lka ndiose 'in ne' kan'. Lo'o ngwaña'an, siye' 'a ngi'ni ne' lo'o ta'a ne', ni siya ndi'in cha' ka jyu'u 'a ti' ne'; xkwi' nsu'wi tiye ne' 'in nchga nan nu nsu'wi lo chalyuu.

20 Nan ni, nde se'en ndi'in Ndiose siya' ti, nde kwa ndi'in kichen tyian nu chañi ka. Lo'o ni, su'we 'a nka tiye'an ndi'in taan 'in X'naan Jesucristo, ña'an bra tyo'o Ni ni' kwan kwi' se'en nu ka kichen tyian, cha' kan y'ya Ni 'ñaan lo chalyuu, cha' kulaa ji Ni 'ñaan.

21 Xa'an Ndiose tyukwi ña'aan bra kan', cha' kaan sa ña'an nu lka ykwi' Ni. Na'an 'a tian' tyukwi ña'aan ni, lo'o Ndiose, su'we 'a ña'an Ni tyukwi

ña'aan Ni; kan' cha' xa'an Ni 'ñaan tyukwi ña'aan cha' kaan sa ña'an nu nchka ti' Ni nde loo la bra kan'. Ka 'in Ni kulo Ni tñan 'in nchga lo nan nu nsu'wi chalyuu, lo'o ngwaña'an, ka 'in Ni xa'an Ni tyukwi ña'aan siya' ti.

4

Nchga tsan ka su'we ka tiyeen chabiya' 'in nu nka X'naan

¹ 'Wan ta'a msñian cha' 'in Jesús, ndiya 'a tiän' 'wan; nten nu wa nda Ndiose 'ñaän lka wan, cha' su'wa ngi'nian tñan 'in Ni. Su'we 'a nka tiyeen cha' 'wan, lo'o ngwaña'an, xi'in chin' tiän' xa nu ja ndi'iin se'en ndi'in wan. Ku'ni wan tñan cha' kanun su'we cha' 'in nu nka X'naan ni' kasiya 'wan.

² Lo'o 'wan Evodia lo'o Síntique ni, ku'ni wan cha' tlyu ti' 'ñaän chkwiin' ska cha' lo'o wan: Ndi'in cha' su'wa ti xu'wi tiye wan lo'o ta'a wan. Jesús nu nka X'naan y'ni cha' lka wan ta'aan, kan' cha' ku'ni wan cha' katin cha' wsuun nu nsu'wi 'wan lo'o ta'a wan.

³ Lo'o nu'win ni, nu su'we 'a ta'a nda'aän tñan, nchka tiän' cha' tayaa' 'in ta'a tyukwaa ne' kula kan', cha' ka su'we tiye ne' kan' lo'o ta'a ne'. Ta'a tyukwaa ne' kula kan' wa y'ni 'a ne' tñan cha' kanen la cha' su'we 'in Jesús nu ngwa xkan'; su'wa ti y'ni ne' kan' tñan lo'oön, lo'o Clemente, lo'o xka ne' ta'a nda'an ba tñan. Wa mda'an nin nchga ne' kan' lo kityi 'in Ndiose, se'en ndukwa nin nten nu kaja chalyuu nu ja tsaa tii 'a 'in ne'.

⁴ Nchka tiän' cha' nchga tsan ka su'we ka tiye wan chabiya' 'in nu nka X'naan. Ni siya tukwa

ya' chkwiiñ' cha' kan' lo'o wan: ꞑNchka tiǎn' cha' ka su'we ka tiye wan!

⁵ Xkwi' chka t'nan 'a ti' wan 'in nchga nten, cha' ka biya' ti' ne' cha' ngwaña'an ngi'ni wan. Wa ndla ti kan ykwi' X'naan xiya'.

⁶ Ja ska cha' kuwe ti' wan se'en, jñan wan cha' 'in Ndiose cha' 'in ya ña'an ti cha' nu ka 'wan. Lo'o ngwaña'an, tya wan xu'we 'in Ndiose cha' 'in nchga cha' nu nchka 'wan, bra nu chkwii' wan lo'o Ni.

⁷ Lo'o kan' tiin ti tyi'in wan, ni siya ja ka biya' ti' nten chalyuu ni cha' lka 'wan ngwaña'an. Ja ki'ya cha' kuxi ke wan bra kan', ja ka kuxi kasiya 'wan bra kan', chun' nu wa ngwa su'wa cha' 'wan lo'o Jesucristo.

Xu'wi tiyeañ 'in nchga cha' nu su'we la

⁸ 'Wan ta'a msñian cha' 'in Krixtu, nde ña'an tya'an cha' tiye wan tyukwi tyempu nu ndi'in wan lo chalyuu: Tya'an cha' tiye wan 'in nchga cha' nu ñi; lo'o nchga cha' nu ngi'ni tlyu nten 'in, nchga ña'an nu ñi la ku'nian lo'o nten, nchga cha' nu luwi la xu'wi tiyeañ, nchga cha' nu su'we 'a ña'an, nchga cha' nu su'we 'a ndiya ti' ne' ña'an ne', ni siya nchga cha' su'we kan', nu ngwaña'an su'we 'a nchkwii' nten 'in, kan' lka cha' nu ndi'in cha' xu'wi tiye wan.

⁹ Tyu'wi ti' wan nchga cha' nu wa y'ni xa'an wan 'ñañ, ni siya ska cha' nu wa ynan wan ti bra nu wa ykwiñ' cha' kan' lo'o wan, ni siya ska cha' nu wa na'an wan ngi'niñ; kan' lka cha' nu ndi'in cha' ku'ni wan, lo'o ku'ni Ndiose cha' tiin ti tyi'in ni kasiya 'wan bra kan'.

Su'we 'a nka tiye Palyu cha' wa yan lo'o ne' lomstan se'en ndi'in yu

10 Su'we 'a nka tiyeēn bra nu na'aān cha' ngala lomstan nu msu'wa wan cha' mdiyan se'en ndi'iin. Jlyo tiān' cha' Jesús nu nka X'naan y'ni cha' ndyu'wi ti' wan 'ñāān xiya', kan' cha' su'we 'a nka tiyeēn. Jlyo tiān' cha' ja mjlyaa ti' wan 'ñāān, ni siya ja mjwi ña'an taya' wan 'ñāān ti ngwa xkan' la.

11 Ja chkwīin' cha' lyiji 'a cha' su'we 'ñāān; su'we 'a ngala' tiān' lo'o ya ña'an ti nan nu ndyiji 'ñāān.

12 Ndiya ya' nu lyiji 'a nan 'ñāān, lo'o ndiya ya' nu ka'an 'a nan mjwi 'ñāān; ngwaña'an ngala' tiān' lo'o ya ña'an ti nan nu kaja 'ñāān nchga se'en nda'aān lo tñan re. Ja n'ni cha' 'ñāān ni siya su'we 'a ndyiji nan kuūn, ni siya ngite' tiān'; ni siya ka'an 'a nan nsu'wi 'ñāān, ni siya chin' 'a, ja ndlo 'a cha' kan' 'ñāān.

13 Kwi' Krixtu nda jwersa 'ñāān cha' taloūn 'in nchga cha', nan lka nu kaja 'ñāān.

14 Ni siya ngwaña'an, su'we 'a nka tiyeēn cha' wa ndaya' wan 'ñāān bra nu ndijiin cha' kuxi nde re.

15 'Wan ne' Filipos, jlyo ti' wan sa ña'an ngwa 'ñāān bra nu mdo'oūn lo yuu 'in Macedonia, cha' nu mda'aān ykwiin' cha' 'in Jesús lo'o ne' kan'; bra kan' ska ta ti wan nu ngi'ni tnun wan 'in Ndiöse nde kwa, nda wan lomstan cha' ka xu'we 'ñāān, cha' su'we 'a y'ni xa'an wan cha' 'in Jesús bra nu mdi'iin se'en ndi'in wan.

16 Lo'o ngwaña'an, tyun ya' wa nda wan xu'we 'ñāān cha' kaja chin' nan nu tyijin yu'wi 'ñāān nde kichen Tesalónica.

17 Lo'o si'i nan nka tiyeēn cha' kaja ska cha' su'we 'ñāān, su'we la nka tiyeēn ni siya kanun

su'we cha' 'in Ndiose ni' kasiya 'wan.

¹⁸ Nde lka cha' nu chkwiñ' lo'o wan ni: Wa ka'an 'a nan nda wan 'ñañ, kan' cha' nchka 'a tiñ' tyañ xu'we 'wan; ja ndiya xka nan nu lyiji 'ñañ bra ni, ti bra nu yan Epafrodito, yan lo'o yu nchga cha' su'we nu wa nda wan 'ñañ. Ña'an ti' ska lomstan nu ndiya 'a ti' Ndiose 'in, ska nan nu nxkwa xi 'a tyi'i nchga se'en, ngwaña'an lka cha' su'we nu nda wan 'ñañ cha' 'in Ndiose.

¹⁹ Tnun 'a cha' su'we ndi'in 'in Ndiose, kan' cha' ta Ni nchga nan nu lyiji cha' tyijin yu'wi 'wan lo chalyuu; jlyo tiñ' cha' ngwaña'an ngi'ni X'naan lo'o nten chabiya' 'in Jesucristo.

²⁰ ¡Tyukwi tyempu ku'ni tnuan 'in Ndiose Stian sikwa! Ngwaña'an ka cha'.

Mslaa' yu 'in ne'

²¹ Chabiya' 'in Jesucristo ta ba kasiya 'wan ta'a wan, ta'a nten 'in Ndiose nu ndi'in nde kwa; kwi' ngwaña'an nchka ti' nchga ne' ta'a nda'an ba nde re.

²² Lo'o nchga ne' nu msñi cha' 'in Ndiose kichen re, lo'o ne' nu ndi'in ngi'ni tñan ni' ña'an tlyu cha' 'in x'naan nu nka ndloo la nu nka emperador, nchka 'a ti' ne' chkwi' ne' su'we lo'o wan.

²³ Lo'oñ nchka 'a tiñ' cha' ña'an ti ku'ni la Jesucristo nu nka X'naan cha' su'we lo'o wan tyukwi tyempu nu ndijyan nde loo la. Ngwaña'an ka cha'.

**Cha' su'we nu nchkwi' cha' 'in Jesucristo nu
nka x'naan
New Testament in Chatino, Western Highland
(MX:ctp:Chatino, Western Highland)**

copyright © 1992 Wycliffe Bible Translators, Inc.

Language: Chatino, Western Highland

Translation by: Wycliffe Bible Translators, Inc.

Chatino, Zona Alta Occidental [ctp], Mexico

Copyright Information

© 1992, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Chatino, Western Highland

© 1992, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 18 Apr 2025 from source files
dated 29 Jan 2022
de5120df-8f34-5747-88ef-b19cf963f07d